

2 Patras

¹ Yih khat Īsā Masīh ke k̄hādīm aur rasūl Shamāūn Patras kī taraf se hai.

Main un sab ko likh rahā hūn jinheñ hamāre K̄hudā aur Najātdahindā Īsā Masīh kī rāstbāzī ke wasīle se wuhī beshqīmat imān baḡhshā gayā hai jo hameñ bhī milā.

² K̄hudā kare ki āp use aur hamāre K̄hudāwand Īsā ko jānane meñ taraqqī karte karte kasrat se fazl aur salāmatī pāte jāeñ.

Allāh kā Bulāwā

³ Allāh ne apnī ilāhī qudrat se hameñ wuh sab kuchh atā kiyā hai jo k̄hudātars zindagī guzārne ke lie zarūrī hai. Aur hameñ yih use jān lene se hāsīl huā hai. Kyoñki us ne hameñ apne zātī jalāl aur qudrat ke zariye bulāyā hai. ⁴ Is jalāl aur qudrat se us ne hameñ wuh azīm aur beshqīmat chīzeñ dī haiñ jin kā wādā us ne kiyā thā. Kyoñki wuh chāhtā thā ki āp in se duniyā kī burī k̄hāhishāt se paidā hone wāle fasād se bach kar us kī ilāhī zāt meñ sharīk ho jāeñ. ⁵ Yih sab kuchh pesh-e-nazar rakh kar pūrī lagan se koshish kareñ ki āp ke imān se aḡhlāq paidā ho jāe, aḡhlāq se ilm, ⁶ ilm se zabt-e-nafs, zabt-e-nafs se sābitqadmī, sābitqadmī se k̄hudātars zindagī, ⁷ k̄hudātars zindagī se barādarānā shafqat aur barādarānā shafqat se sab ke lie muhabbat. ⁸ Kyoñki jitnā hī āp in k̄hūbiyon meñ barhte jāeñge utnā hī yih āp ko is se mahfūz rakheñgī ki āp hamāre K̄hudāwand

Īsā Masīh ko jānane meñ sust aur bephal raheñ. ⁹ Lekin jis meñ yih khūbiyān nahīn haiñ us kī nazar itnī kamzor hai ki wuh andhā hai. Wuh bhūl gayā hai ki use us ke guzare gunāhoñ se pāk-sāf kiyā gayā hai.

¹⁰ Chunānche bhāiyo, mazīd lagan se apne bulāwe aur chunāo kī tasdīq karne meñ koshān raheñ. Kyoñki yih karne se āp gir jāne se bacheñge ¹¹ aur Allāh baṛī ḡhushī se āp ko hamāre Ḳhudāwand aur Najātdahindā Īsā Masīh kī bādshāhī meñ dāḡhil hone kī ijāzat degā.

¹² Is lie main hameshā āp ko in bātoñ kī yād dilātā rahūngā, hālāñki āp in se wāqif haiñ aur mazbūtī se us sachchāi par qāym haiñ jo āp ko milī hai. ¹³ Balki main apnā farz samajhtā hūñ ki jitnī aur der main jism kī is jhoñpṛī meñ rahtā hūñ āp ko in bātoñ kī yād dilāne se ubhārtā rahūñ. ¹⁴ Kyoñki mujhe mālūm hai ki ab merī yih jhoñpṛī jald hī dhā dī jāegī. Hamāre Ḳhudāwand Īsā Masīh ne bhī mujh par yih zāhir kiyā thā. ¹⁵ Lekin main pūrī koshish karūnga ki mere kūch kar jāne ke bād bhī āp har waqt in bātoñ ko yād rakh sakeñ.

Masīh ke Jalāl ke Gawāh

¹⁶ Kyoñki jab ham ne āp ko apne aur āp ke Ḳhudāwand Masīh kī qudrat aur āmad ke bāre meñ batāyā to ham chālākī se ghaṛe qisse-kahāniyoñ par inhisār nahīn kar rahe the balki ham ne yih gawāhoñ kī haisiyat se batāyā. Kyoñki ham ne apnī hī āñkhoñ se us kī azmat dekhī thī. ¹⁷ Ham maujūd the jab use Ḳhudā

Bāp se izzat-o-jalāl milā, jab ek āwāz ne Allāh kī purjalāl shān se ā kar kahā, “Yih merā pyārā Farzand hai jis se main̄ khush hūn.” ¹⁸ Jab ham us ke sāth muqaddas pahār par the to ham ne khud yih āwāz āsmān se ātī sunī.

¹⁹ Is tajrabe kī binā par hamārā nabiyoñ ke paighām par etamād zyādā mazbūt hai. Āp achchhā kareñge agar is par khūb dhyān deñ. Kyoñki yih kisī tārīk jagah meñ raushnī kī mānind hai jo us waqt tak chamaktī rahegī jab tak pau phaṭ kar subah kā sitārā āp ke dilōñ meñ tulū na ho jāe. ²⁰ Sab se barh kar āp ko yih samajhne kī zarūrat hai ki kalām-e-muqaddas kī koī bhī peshgoī nabī kī apnī hī tafsīr se paidā nahīn hotī. ²¹ Kyoñki koī bhī peshgoī kabhī bhī insān kī tahrīk se wujūd meñ nahīn āī balki peshgoī karte waqt insānoñ ne Rūhul-quds se tahrīk pā kar Allāh kī taraf se bāt kī.

2

Jhūṭe Ustād

¹ Lekin jis tarah mazī meñ Isrāīl qaum meñ jhūṭe nabī bhī the, usī tarah āp meñ se bhī jhūṭe ustād khare ho jāenge. Yih Khudā kī jamātoñ meñ mohlak tālīmāt phailāenge balki apne mālik ko jānane se inkār bhī kareñge jis ne unheñ kharīd liyā thā. Aisī harkatoñ se yih jald hī apne āp par halākat lāenge. ² Bahut-se log un kī aiyāsh harkatoñ kī pairawī kareñge, aur is wajah se dūsre sachchāī kī rāh par kufr bakeñge. ³ Lālach ke sabab se yih ustād āp ko farzī kahāniyān sunā kar āp kī lūṭ-khasoṭ

kareᅅge. Lekin Allāh ne baᅇi der se unheᅅ mujrim ᅇahrayā, aur us kā faislā sustraftār nahīᅅ hai. Hāᅅ, un kā munsif ūᅅgh nahīᅅ rahā balki unheᅅ halāk karne ke lie taiyār kharā hai.

⁴ Dekheᅅ, Allāh ne un farishton ko bachne na diyā jinhon ne gunāh kiyā balki unheᅅ tārikī kī zanjiron meᅅ bāndh kar jahannum meᅅ dāl diyā jahāᅅ wuh adālat ke din tak mahfūz raheᅅge.

⁵ Isī tarah us ne qadīm duniyā ko bachne na diyā balki us ke bedīn bāshindon par sailāb ko āne diyā. Us ne sirf rāstbāzī ke paighambar Nūh ko sāt aur jānon samet bachāyā. ⁶ Aur us ne Sadūm aur Amūrā ke shahron ko mujrim qarār de kar rākh kar diyā. Yoᅅ Allāh ne unheᅅ ibrat banā kar dikhāyā ki bedīnon ke sāth kyā kuchh kiyā jāegā. ⁷ Sāth sāth us ne Lūt ko bachāyā jo rāstbāz thā aur be'usūl logon ke gande chāl-chalan dekh dekh kar pistā rahā. ⁸ Kyonki yih rāstbāz ādmī un ke darmiyān bastā thā, aur us kī rāstbāz jān roz baroz un kī sharīr harkateᅅ dekh aur sun kar saᅇht azāb meᅅ phaᅅsī rahī.

⁹ Yoᅅ zāhir hai ki Rab dīndār logon ko āzmāish se bachānā aur bedīnon ko adālat ke din tak sazā ke taht rakhnā jāntā hai, ¹⁰ ᅇhāskar unheᅅ jo apne jism kī gandī ᅇhāhishāt ke pīchhe lage rahte aur ᅇhudāwand ke iᅇhtiyār ko haᅇir jānte haiᅅ.

Yih log gustāᅇh aur maᅇhrūr haiᅅ aur jalālī hastiyon par kufr bakne se nahīᅅ ᅇarte. ¹¹ Is ke muᅇābale meᅅ farishte bhī jo kahīᅅ zyādā tāqatwar aur qawī haiᅅ Rab ke huzūr aisī hastiyon par buhtān aur ilzāmāt lagāne kī jurrat nahīᅅ karte. ¹² Lekin yih jhūᅇe ustād beaᅇl jānwaron kī mānind haiᅅ, jo fitrī taur par is

lie paidā hue haiñ ki unheñ pakaṛā aur khatm kiyā jāe. Jo kuchh wuh nahīn samajhte us par wuh kufr bakte haiñ. Aur janglī jānwaroñ kī tarah wuh bhī halāk ho jāenge. ¹³ Yoñ jo nuqsān unhoñ ne dūstroñ ko pahuñchāyā wuhī unheñ k̄hud bhugatnā paṛegā. Un ke nazdīk lutf uṭhāne se murād yih hai ki dīn ke waqt khul kar aish karen. Wuh dāgh aur dhabbe haiñ jo āp kī ziyāfatoñ meñ sharīk ho kar apnī daḡhābaziyoñ kī rangraliyāñ manāte haiñ. ¹⁴ Un kī ānkheñ har waqt kisī badkār aurat se zinā karne kī talāsh meñ rahtī haiñ aur gunāh karne se kabhī nahīn ruktīñ. Wuh kamzor logoñ ko ḡhalat kām karne ke lie uksāte aur lālach karne meñ māhir haiñ. Un par Allāh kī lānat! ¹⁵ Wuh sahīh rāh se haṭ kar āwārā phir rahe aur Bilām bin Baor ke naqsh-e-qadam par chal rahe haiñ, kyoñki Bilām ne paison ke lālach meñ ḡhalat kām kiyā. ¹⁶ Lekin gadhī ne use is gunāh ke sabab se dāntā. Is jānwar ne jo bolne ke qābil nahīn thā insān kī-sī āwāz meñ bāt kī aur nabī ko us kī dīwānaḡī se rok diyā.

¹⁷ Yih log sūkhe hue chashme aur āndhī se dhakele hue bādāl haiñ. In kī taqdīr andhere kā tārikhtarīñ hissā hai. ¹⁸ Yih maḡhrūr bāteñ karte haiñ jin ke pīchhe kuchh nahīñ hai aur ḡhairaḡhlāqī jismānī shahwatoñ se aise logoñ ko uksāte haiñ jo hāl hī meñ dhoke kī zindagī guzārne wāloñ meñ se bach nikle haiñ. ¹⁹ Yih unheñ āzād karne kā wādā karte haiñ jabki k̄hud badkārī ke ḡhulām haiñ. Kyoñki insān usī kā ḡhulām hai jo us par ḡhālib ā gayā hai. ²⁰ Aur jo hamāre K̄hudāwand aur Najātdahindā Īsā

Masīh ko jān lene se is duniyā kī ālūdaḡī se bach nikalte haiñ, lekin bād meñ ek bār phir is meñ phañs kar maḡhlūb ho jāte haiñ un kā anjām pahle kī nisbat zyādā burā ho jātā hai. ²¹ Hañ, jin logoñ ne rāstbāzī kī rāh ko jān liyā, lekin bād meñ us muḡaddas hukm se muñh pher liyā jo un ke hawāle kiyā gayā thā, un ke lie behtar hotā ki wuh is rāh se kabhī wāqif na hote. ²² Un par yih muhāwarā sādiq ātā hai ki “Kuttā apnī qai ke pās wāpas ā jātā hai.” Aur yih bhī ki “Suarnī nahāne ke bād dubārā kīchar meñ loṭne lagtī hai.”

3

Ḳhudāwand kī Āmad kā Wādā

¹ Azīzo, yih ab dūsrā ḡhat hai jo main ne āp ko likh diyā hai. Donoñ ḡhaton meñ main ne kāi bāton kī yād dilā kar āp ke zahnon meñ pāk soch ubhārne kī koshish kī. ² Main chāhtā hūñ ki āp wuh kuchh yād rakheñ jis kī peshgoī muḡaddas nabiyon ne kī thī aur sāth sāth hamāre Ḳhudāwand aur Najātdahindā kā wuh hukm bhī jo āp ko apne rasūlon kī mārifat milā. ³ Awwal āp ko yih bāt samajhne kī zarūrat hai ki in āḡhirī dinoñ meñ aise log āeñge jo mazāq urā kar apnī shahwaton ke qabze meñ raheñge. ⁴ Wuh pūchheñge, “Īsā ne āne kā wādā to kiyā, lekin wuh kahāñ hai? Hamāre bāpdādā to mar chuke haiñ, aur duniyā kī taḡhlīq se le kar āj tak sab kuchh waise kā waisā hī hai.” ⁵ Lekin yih log nazarandāz karte haiñ ki qadīm zamāne meñ Allāh ke hukm par āsmānon kī taḡhlīq huī aur zamīn pānī meñ se aur pānī ke

zariye wujūd meñ āī. ⁶ Isī pānī ke zariye qadīm zamāne kī duniyā par sailāb āyā aur sab kuchh tabāh huā. ⁷ Aur Allāh ke isī hukm ne maujūdā āsmān aur zamīn ko āg ke lie mahfūz kar rakhā hai, us din ke lie jab bedīn logoñ kī adālat kī jāegī aur wuh halāk ho jāenge.

⁸ Lekin mere azīzo, ek bāt āp se poshīdā na rahe. Khudāwand ke nazdīk ek din hazār sāl ke barābar hai aur hazār sāl ek din ke barābar. ⁹ Khudāwand apnā wādā pūrā karne meñ der nahīn kartā jis tarah kuchh log samajhte haiñ balki wuh to āp kī khātir sabar kar rahā hai. Kyonki wuh nahīn chāhtā ki koī halāk ho jāe balki yih ki sab taubā kī naubat tak pahuñcheñ.

¹⁰ Lekin Khudāwand kā din chor kī tarah āegā. Āsmān bare shor ke sāth khātm ho jāenge, ajrām-e-falakī āg meñ pighal jāenge aur zamīn us ke kāmōñ samet zāhir ho kar adālat meñ pesh kī jāegī. ¹¹ Ab socheñ, agar sab kuchh is tarah khātm ho jāegā to phir āp kis qism ke log hone chāhien? Āp ko muqaddas aur khudātars zindagī guzārte hue ¹² Allāh ke din kī rāh dekhnī chāhie. Hāñ, āp ko yih koshish karnī chāhie ki wuh din jaldī āe jab āsmān jal jāenge aur ajrām-e-falakī āg meñ pighal jāenge. ¹³ Lekin ham un nae āsmānoñ aur naī zamīn ke intazār meñ haiñ jin kā wādā Allāh ne kiyā hai. Aur wahāñ rāstī sukūnat karegī.

¹⁴ Chunāñche azīzo, chūnki āp is intazār meñ haiñ is lie pūrī lagan ke sāth koshāñ raheñ ki āp Allāh ke nazdīk bedāgh aur be'ilzām thahreñ aur āp kī us ke sāth sulah ho. ¹⁵ Yād rakheñ ki hamāre Khudāwand kā sabar logoñ ko najāt

pāne kā mauqā detā hai. Hamāre azīz bhāi Paulus ne bhī us hikmat ke mutābiq jo Allāh ne use atā kī hai āp ko yihī kuchh likhā hai. ¹⁶ Wuh yihī kuchh apne tamām ḵhatōñ meñ likhtā hai jab wuh is mazmūn kā zikr kartā hai. Us ke ḵhatōñ meñ kuchh aisī bāteñ haiñ jo samajhne meñ mushkil haiñ aur jinheñ jāhil aur kamzor log toṛ-marōṛ kar bayān karte haiñ, bilkul usī tarah jis tarah wuh bāqī sahīfoñ ke sāth bhī karte haiñ. Lekin is se wuh apne āp ko hī halāk kar rahe haiñ.

¹⁷ Mere azīzo, main āp ko waqt se pahle in bātoñ se āgāh kar rahā hūñ. Is lie ḵhabardār raheñ tāki be'usūl logoñ kī ḡhalat soch āp ko bahkā kar āp ko mahfūz maqām se haṭā na de. ¹⁸ Is ke bajāe hamāre Ḵhudāwand aur Najātdahindā Īsā Masīh ke fazl aur ilm meñ taraqqī karte raheñ. Use ab aur abad tak jalāl hāsīl hotā rahe! Āmīn.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-05-06

PDF generated using Haiola and XeLaTeX on 11 Nov 2022 from source files dated 7 May 2022

123ff8cb-27b3-5817-a02a-22e67145fd30